

全唐诗卷三百三十

卷 330_1

【奉酬礼部阁老转韵离合见赠（时为秘书监）】张荐

移居既同里，多幸陪君子。
弘雅重当朝，弓旌早见招。
植根琼林圃，直夜金闺步。
劝深子玉铭，力竞相如赋。
间阔向春闱，日复想光仪。
格言信难继，木石强为词。

卷 330_2

【和潘孟阳春日雪回文绝句】张荐

迟迟日气暖，漫漫雪天春。
君欲醉饮，思见此交亲。

卷 330_3

【享文恭太子庙乐章】张荐

三献具举，九旗将旋。
追劳表德，罢享宾天。
风引仙管，堂虚画筵。
芳馨常在，瞻望悠然。

卷 330_4

【礼部权侍郎阁老史馆张秘监阁老有离合酬赠聊继此章】崔邠

脉脉羨佳期，月夜吟丽词。
谏垣则随步，东观方承顾。
林雪消艳阳，简册漏华光。
坐更芝兰室，千载各芬芳。
节苦文俱盛，即时人并命。
翩翩紫霄中，羽翮相辉映。

卷 330_5

【享文恭太子庙乐章】崔邠

醴齐泛樽彝，轩县动干戚。
入室僊如在，升阶虔所历。
奋疾合威容，定利舒曷泽。
方崇庙貌礼，永被君恩锡。

卷 330_6

【和权载之离合诗（时为中书舍人）】杨於陵

校德尽珪璋，才臣时所扬。
放情寄文律，方茂经邦术。



王猷符发挥，十载契心期。
昼游有嘉话，书法无隐辞。
信兹酬和美，言与芝兰比。
昨来恣吟绎，日觉祛蒙鄙。

卷 330_7

【郡斋有紫薇双本自朱明接于徂暑其花芳馥…因诗纪述】杨於陵

晏朝受明命，继夏走天衢。
逮兹三伏候，息驾万里途。
省躬既踟躇，结思多烦纡。
簿领幸无事，宴休谁与娱。
内斋有嘉树，双植分庭隅。
绿叶下成幄，紫花纷若铺。
摘霞晚舒艳，凝露朝垂珠。
炎沴昼方铄，幽姿闲且都。
夭桃固难匹，芍药宁为徒。
懿此时节久，讵同光景驱。
陶甄试一致，品汇乃散殊。
濯质非受彩，无心那夺朱。
粤予负羁縻，留赏益踟蹰。
通夕靡云倦，西南山月孤。

卷 330_8

【赠毛仙翁】杨於陵

先生赤松侣，混俗游人间。
昆阆无穷路，何时下故山。
千年犹孺质，秘术救尘寰。
莫便冲天去，云雷不可攀。



卷 330_9

【答权载之离合诗（时为给事中）】许孟容

史才司秘府，文哲今超古。
亦有擅风骚，六联文墨曹。
圣贤三代意，工艺千金字。
化识从臣谣，人推仙阁吏。
如登昆阆时，口诵灵真词。
孙简下威凤，系霜琼玉枝。

卷 330_10

【奉和武相公春晓闻莺】许孟容

碧树当窗啼晓莺，间关入梦听难成。
千回万啭尽愁思，疑是血魂哀困声。

卷 330_11

【享文恭太子庙乐章】许孟容

觞牢具品，管弦有节。
祝道寅恭，神仪昭晰。
桐珪早贵，象辂追设。
磬达乐成，降歆丰洁。

卷 330_12

【和权载之离合诗（时为给事中）】冯伉

车马退朝后，聿怀在文友。
动词宗伯雄，重美良史功。
亦曾吟鲍谢，二妙尤增价。
雨霜鸿唳天，匝树鸟鸣夜。
覃思各纵横，早擅希代名。
息心欲焚砚，自覩陪群英。

卷 330_13

【享文恭太子庙乐章二首】冯伉

撰日瞻景，诚陈乐张。
礼容秩秩，羽舞煌煌。
肃将涤濯，祇荐芬芳。
永锡繁祉，思深享尝。
干旄羽籥相亏蔽，一进一退殊行缀。
昔献三雍盛礼容，今陈六佾崇仪制。

卷 330_14

【和权载之离合诗】潘孟阳

咏歌有离合，永夜观酬答。
笥中操彩笺，竹简何足编。
意深俱妙绝，心契交情结。
计彼官接联，言初并清切。
翔集本相随，羽仪良在斯。
烟云竞文藻，因喜玩新诗。

卷 330_15

【春日雪以回文绝句呈张荐权德舆】潘孟阳

春梅杂落雪，发树几花开。
真须尽兴饮，仁里愿同来。

卷 330_16

【元日和布泽】潘孟阳

至德生成泰，咸欢照育恩。
流辉沾万物，布泽在三元。
北阙祥云迥，东方嘉气繁。
青阳初应律，苍玉正临轩。
恩洽因时令，风和比化原。

自惭同草木，无以答乾坤。

卷 330_17

【和权载之离合诗（时为国子司业）】武少仪

少年慕时彦，小悟文多变。
木铎比群英，八方流德声。
雷陈美交契，雨雪音尘继。
恩顾各飞翔，因诗睹瑰丽。
傅野绝遗贤，人希有盛迁。
早钦风与雅，日咏赠酬篇。

卷 330_18

【诸葛丞相庙（《蜀志》一作武侯祠）】武少仪

执简焚香入庙门，武侯神象俨如存。
因机定蜀延衰汉，以计连吴振弱孙。
欲尽智能倾僭盗，善持忠节转庸昏。
宣王请战贻巾帨，始见才吞亦气吞。

